

21 JUN 2002

UMNO: USUL UCAPAN DASAR PRESIDEN LULUS SEBULAT SUARA

KUALA LUMPUR, 21 Jun (Bernama) -- Usul terima kasih ucapan dasar Presiden Umno bertema "Mendedah Yang Terbuka" diluluskan sebulat suara petang ini oleh Perhimpunan Agung Umno yang bersidang di Pusat Dagangan Dunia Putra di sini.

Usul itu yang dibentangkan semalam telah dibahaskan oleh 17 anggota perwakilan termasuk wakil Puteri Umno, entiti baru parti yang disahkan semalam.

Dalam ucapannya semalam, Datuk Seri Dr Mahathir antara lain menyentuh mengenai masa depan bangsa Melayu yang belum selamat, perpecahan di kalangan mereka, hukum Hudud ala PAS dan isu keganasan yang dihadapi dunia.

Beliau turut menjelaskan mengenai kedudukan Malaysia sebagai negara Islam serta menyuarakan kebimbangannya mengenai kesan buruk perceraian keluarga yang banyak berlaku di kalangan orang Melayu.

Perdana Menteri turut menekankan aspek menjadikan orang Melayu berdaya saing serta maju dalam era globalisasi dan zaman teknologi.

Untuk mencapai kedudukan itu orang Melayu perlu menguasai teknologi maklumat dan komunikasi (ICT) serta Bahasa Inggeris tanpa menghakis jatidiri bangsa Melayu dan kedaulatan bahasa kebangsaan.

-- BERNAMA

HK AZZ RHM